

儀孝堂詩集

丁巳十月  
延閣署



線

851.482

8769

舊籍







儀 詩

集 孝



堂

蔣作賓

敬題





詩

集

卷

詩  
集

卷





3/水  
851.482  
8769

# 序

儀孝堂詩集二卷張何夫人之所著也夫人爲衡陽何通隱先生女弟適湘鄉張伯純先生夫家母族並爲名門兩先生又通才碩學餘事能詩佳句流傳世所推仰夫人姊妹娣姒各擅才名篇什唱酬由來盛矣今歲丁巳夫人年政六十令女默君女士及其弟妹將哀集付刊以爲母壽妹壻蔣雨巖將軍授延闈讀之延闈年十四得奉手通隱先生猥見知賞後復得見伯純先生屢共周旋既習徽音宜有贊述乃爲敍曰古之女士以德行著稱蓋未有不文者莊姜作詩班姬能賦逮於曹左鮑徐之倫皆有述作彰於前典爰及近世聲稱益繁湖外騷人之鄉流風未沫才賢輩出尤盛於清閨門之產有若湘陰李氏湘潭郭氏周氏清詞麗句傳擅一時然語其流別每囿凡近以云復古或尙多慙夫人則沈酣三唐淵源八代風骨旣騫芬芳自遠當夫中閨多暇寫韻方閒庭陰月

國家圖書館



10130d24  
002436825



來南榮花滿春朝秋夕風和日長弟昆則羯末封胡中外則雙丁二到極觴詠  
之樂有承平之娛此一時也及夫移家白下賃廡吳中憶故鄉之歲時聞新聲  
於子夜裁箋寄意織錦留題恒多覽古之辭亦有懷人之什此又一時也至於  
中更烽火晚閱滄桑卽古憂時怨遙傷遠寄哀唵於漆室託微尙於瓊枝不無  
危苦之詞自寫幽憂之致此又一時也况乃紗幔之前已多子弟庭階之上更  
有芝蘭大家續班史之編小喬以周郎爲壻貽書戒子含飴弄孫海內奉爲女  
師異國求其詩草其爲福慧更異前人詩曰靜女其變貽我彤管又曰魯侯燕  
喜令妻壽母夫人有焉迦陵婦人之集長沙宮闈之選儼於此編尙非倫也丁  
巳十月茶陵譚延闓序



儀孝堂主人五十三歲攝影






第十三卷

主人正十三卷

第十三卷






張母何太夫人像贊

高文懿德遠識清風  
衡湘壽母共和女宗

林森敬題









張母何太夫人  
象贊

文

德


長

留

蔣中正題









儀孝堂詩集卷一

衡陽張何承徽懿生

古體

曉春辭

東風吹夢回天涯。綠楊麗日猶眠鴉。朝烟涼隔碧紗影。敲簾細落天桃花。花光  
歷亂春無處。咫尺紅霞鏡中曙。畫堂寂靜掩芳菲。一鳥啼花送春去。

明宵辭懷五姊

紫燕辭南雁。辭北瑟瑟龍吟秋。管裂萬籟俱急。蘭膏青此際。懷人正愁絕。瞻望  
深兮。愴容與起。折芙蓉兮隔秋水。星黃黃兮不可將。玉箱金肥夢徽光。

秋浦歌

秋浦頻年別。秋江日夜流。還如隴頭水。嗚咽白人頭。



漱灑秋浦月。玉輝生夕陰。幾朝辭綠鬢。秋色便相侵。况有清猿怨。能傷遠客心。  
靜夜曲  
星河澹澹瀉華秋。露泣芙蓉紅更愁。蓮漏悒悒籤十二。獨擊鸚鵡在高樓。誰家  
翠裏彈箏客。銀甲新聲寫明燼。一彈再彈秋水寒。老兔無聲桂凝碧。

○ 擬陶靖節

謝彼塵世踪。蕭然百憂失。豈云斯養高。要在履貞吉。來憩北窗下。悠然見山色。  
白雲自幽致。飛鳥心亦得。忘機誰與同。閉關獨淵默。

○ 擬謝宣城

春風吹五兩。逝捐承明戀。緣澗結茅茨。棲雲觀豹變。鳥鳴林壑靜。雨餘翠微現。  
屢與麋鹿遊。時從赤松燕。綠酒歡晨夕。丹芝雜餐膳。移席就清陰。焚香讀黃卷。  
緬爾物象多。熙熙靜中見。



。遊俠篇

驕馬五花總蹀躞。促颺風輕生重意。氣任俠僂豪雄。頭上黃金貂。腰閒雙玉龍。  
赤丸斷民賊。遨遊九術中。荊軻悵已矣。浩氣飛長虹。

。秋閨感懷寄伯純

璇閨生蚤涼。紈扇罷蘭馥。閒來憑高望。佳此風景穆。時菊芳欲遍。秋光已如倏。  
誰家擣衣女。遠念殷征服。急響逐雲端。餘音散林木。我正悲離思。因之感心曲。  
遙憐華鬢垂。想像橫波綠。傷多隕黃髮。幸自保金玉。

玉階繁白露。羅襪生秋塵。躑躅緬庭柯。依依念遠人。星辰猶昨夜。歲月駸無倫。  
因懷舊時歡。彌緩花前尊。簾波圍夢綠。離思逐愁新。明知夢無端。兀自搖秋魂。  
初疑瑤臺下。髣髴煙水濱。何當逐飛鴻。振翮一來賓。

。春雨懷君玉



山翠遠合離絲。雨吹欲歇。想像空山人。魂冷天桃宅。青霞自孤標。明月若可掇。  
彈琴靜流水。裁詩花作骨。楊柳風中梳。絲絲綠如髮。攀條欲有贈。婀娜難爲折。  
苔痕一剪輕。淺淺沾羅襪。甯知絕代子。牽蘿碧雲末。素心宿有期。况乃拳愛結。  
瀟湘不隔夢。夜夜逗波碧。寥寥天宇青。遙情春一脈。

月夜獨酌呈外子

庭祀澹夕颺。翛然百憂屏。紅蘭敷露渠。綠蕪蔭寒井。曖曖金粟光。熒熒玉繩影。  
塵役旣已疲。良宵怯難永。甯靜生道心。坐悟維摩境。

寄懷外子嘉禾

吟蛩碧闌下。夜夜共花語。紅豆落秋風。相思深幾許。  
懷深意轉新。別久情逾篤。畫舫鴨頭波。何時泛寒綠。  
青琴歇幽賞。無憂理徽玉。綠酒佐華鐙。歡燕待君續。



柳

乍可映盧家。那堪迷遠望。恐有畫屏人。魂銷翠樓上。但見一痕青。含情更誰向。縱不惹相思。春光自搖蕩。

留別碩仙兄嫂榴笙姊

十載辭鄉園。幾度來三徑。文窗舊猶綠。花石苔仍靚。含情獨幽蘭。手置猶堪認。何當二三子。嘉會逢斯盛。夜話親情悅。敲詩天籟聞。但恐涼風至。歸期秋燕迅。追歡方未終。離憂忽相迸。阿兄當遠仕。百里勞爲政。阿姊亦離居。遐思滯芳訊。長聚固無因。久別情非分。念茲一揮手。婉戀淒難定。黯然愁綠波。孤帆向烟溟。

蕉窗曉霽

朝旭麗蟬紗。疎雨歇林木。裊裊涼思滿。娟娟寒翠活。綠天淨如許。濃墨待誰潑。

題麓雲僊館圖



麓山聳奇秀。倒影江光涵。六朝小劫餘。留此太古山。一峯絕頂綠。縹緲空青嵌。翩翩仙喬侶。抱琴居此間。泠泠揮五絃。目送孤雲還。誰言古調絕。流水聲潺潺。茫茫塵寰間。何來散僊人。一枝綠玉杖。行盡春山春。摩挲神禹碑。石氣古黛皴。白雲何油油。其心與之鄰。煙霞自歲月。鐘韻無昏晨。手把碧芙蓉。何年朝玉真。

○ 擬蘇子瞻江上值雪

用原韻

沾醉笑解雙金龜。短衾蕭鬢寒先知。推蓬忽訝大地寂。雪花如掌紛相吹。天邊鸛魅走無跡。江上遷客愁霑髭。起撥地爐爇獸炭。還將活火煎流澌。舟膠浦凍行旅絕。頻眺莫辨陵與危。高歌載酒者誰子。亂撲驢背緣鞭絲。雲師試手豈無意。擣霜應同蟾兔爲。空中眩晃勢不定。倏忽掌上仍難持。紛紛甲第總豪縱。妓圍炫耀輕盈肌。讌客自作暖寒會。那知道路啼飢兒。六出今欣已呈瑞。豐年預卜秋及時。伊誰灞橋動詩思。有人僵臥飄牀幃。邇來不聞謝庭詠。至今髣髴神



仙姿卻笑太尉忒蟲俗。羔羊錦帳酣淋漓。嗟予不才久遷謫。戀闕猶夢趨丹墀。  
新法擾擾非善變。輪困肝膽無由披。何事折腰爲升斗。一官荊楚徒奔馳。世間  
顯晦甯有定。不如安坐傾清卮。平生弋獵愛豪舉。南山射虎行追隨。迷離馬上  
望無際。停鞭慷慨爲詠之。

擬杜工部嶽麓道林二寺行同伯純作

長沙山水魁南交。湘上古刹雙岩嶮。千岩角逐此彈壓。羣峯俛仰爭來朝。二寺  
靈闢自太古。盤紆松道殊清蕭。入門清梵裊寒碧。仰見古塔撐雲霄。孕奇育秀  
故千載。鬼物環翊靈宮高。粉牆金榜動光彩。森然下馬趨僧寮。殿宇崔巍倚天  
半。升階偃僂陳酒斝。髣髴空中響天樂。雲旗晝下仙風飄。老夫生平愛遊眺。况  
乃勝蹟寧辭勞。春陽扶杖恣歡賞。登躋直欲凌斗杓。煙霞有分暫棲止。汲泉可  
刷胸中滯。翠巖丹崖鬥奇壯。橘潭蜿蜒環山腰。宋公放逐亦何怨。題壁得與名



勝遭應結茅屋著青壁。呼兒攜酒探幽寥。日落飄風動地至。願吹湘水成芳醪。  
興酣詩思歛奔赴。一揮醉筆星辰搖。杜陵野客行樂耳。功名富貴如秋毫。中原  
欲往箭滿眼。今幸樂國無塵囂。青鞵布襪來福地。山中花鳥如我招。老矣微軀  
更奚適。臥聽萬壑松風號。

上聲曲

惋彼蕙蘭花。芳露零繁縟。不聽上聲歌。誰肯悲秋綠。  
紅羅繡襦襜。盈箱不能御。持底報殷勤。他年白楊樹。

白頭翁

曉自深林出。暮自孤岑返。不爲白頭愁。頭白亦何損。

荷塘露坐

移坐愛修篁。瀟灑映芳池。涓涓風露下。唵曖枝條垂。但覺眉宇清。寧知生翠滋。



迴看玉鈎月。忽墮碧漣漪。圓荷芳蕩漾。秋水亦生姿。時聞功德香。清涼堪散脾。

題畫冊三首

桐陰聯吟

何人脫帽欹蒼石。但覺鬚眉映空碧。都羨黃衫傾倒情。相逢白社風流劇。七字哦成嗣柏梁。酒籌棋局待徐商。桐花暗落醒么鳳。裊裊游絲清晝長。

菊觴雅集

新秋雅集傳芳席。翠盤華燭無時歇。羣英談笑風泠泠。婉婉生香月中發。深杯湫灩初微波。良時那惜朱顏酡。劇須十日傳觴飲。詎可匆匆散玉珂。

寒霄佐讀

書韻琅琅月亭午。禁籞誰家停翠縷。不須共績似徐吾。翻把長離笑裴羽。水晶簾額捲霜痕。歷曆星寒漸嚮晨。他時下直傳蓮炬。好謝紅閨佐讀人。



落花篇

啼鳥脉脉將春曉。花間婉婉寒猶裊。輕飈夜半怨花飈。細雨朝來判春了。小婢  
汲香金井欄。幾番搖落顛花鬢。乍驚立處紅成陣。瞥見飛時錦作團。花開花落  
千門裏。寂寂濃香滿庭圮。鸚鵡雕籠白晝閒。蜀魄關山夢魂紫。橫路游絲百丈  
垂。漫天香霧欲沾衣。鴛鴦水暖窺池近。翡翠簾疏度影遲。乍堪霞隱徂清曙。迷  
離不見花開處。澹蕩春光碧似煙。宛轉花魂紅泣露。錦幃連朝翠影虛。殘英萬  
點曉風疏。生涯夢裏欺蝴蝶。消息黃陵怨鷓鴣。惆悵黃陵煙景暮。可憐梓澤空  
千樹。至今猶惜墜樓人。十萬金鈴誰得護。早歲笙歌芳草迷。如今珠幌落花棲  
生憎紫燕雙雙入。不分嬌鶯恰恰啼。鶯啼燕語渾閒事。馬嵬葬香三尺地。碧落  
茫茫恨有餘。釵鈿渺渺何由寄。春遊醉蠟晃銅荷。棖觸金鈿憶謝娥。盡日胭脂  
飄雨冷。伊誰繡領受香多。香多荏冉風吹發。無端坐落驚鷓鴣。更須一遂玉梅



花留連滿苑歌筵月。

。艾如張

艾綠兮隆隆。翩翩朱鷺巢其中。朝啄玄蜺暮黑蜨。爾笑飛飛雀勞利。俠少羅家東舍郎。冰絲結網平碧張。籠媒日日魚爲餌。莫道艾中安樂鄉。玉山之禾青精實。胡不遠颺甘網織。嗟嗟負爾雙銀翼。

秋宵辭

涼颺颺墮飛螢影。夜深流入花間靜。玉階獨立星斗闌。竹露滿襟月華冷。

采蓮曲

采蓮淥水頭。住近橫塘曲。低鬟垂綠雲。清臚翦寒玉。緞輝香海綯。菡萏驚芳豔。荷翻拂紅舟。菱長繞翠釧。歸來露溼妝。珠濺青蓮房。莫怪停橈晚。花深玉漱長。

秋夜有懷五姊



微風襲蘭杜。秋至林表肅。銀漢不澹流。繁露溥庭綠。攬衣還獨立。攀條復躑躅。  
同心各異處。偃蹇曠清曠。緘書雙玉璫。百里見心曲。  
碧瓦冷霜華。涼風森翠髮。坐緬芳樹林。凋傷更誰折。嬋媛邈何許。空婉歲蕤節。  
招搖紅豆枝。亭亭豔秋月。想思豈云遠。要在咫與尺。悵悵誰可將。星落秋河白。

烏棲曲

可憐楊柳白門西。恰傍盧家少婦閨。年年飛絮春綿綠。催起紅妝啼翠燭。  
華星粲粲烏欲棲。采蓮唱曲度前溪。碧波灑灑如眉色。怪道西施因網得。  
芙蓉作撩蘭作展。素魄霜華交隱起。中婦丁丁金剪刀。龍庭心緒劇勞勞。  
紅弦冷冷翠槃歌。雪光照簾簾內熱。寒烏再啼霞欲暉。美人聽此停鴛機。

雁門太守行

黃沙飛入金連環。甲麟點點胡血殷。昨夜將星紅炯炯。千年髑髏笑陰井。鼓舞



淵淵渡遼水。雪壓龍城馬拳蝟。將軍一箭旄頭墮。前軍已報呼韓縛。

河中之水

河中之水何粼粼。河中女兒賽阿甄。金蟬鈿爵嬌芳辰。踏青嬾拾蘭苕春。間調蓮舟向碧津。芙蓉坐落愁殺人。河東女兒擣匹練。翡翠雙飛會相見。河西女兒居綺寮。鳳凰聲引煖玉簫。河南女兒衣白紵。河北女兒怨機杼。

君玉遺以連環兼枉芳札久而不報昨晤省垣撫今感舊悵然有作

青鳥從西來。遺我一函玉。上嵌紫泥篆。知爲故人屬。殷勤啓題封。不惜再三讀。語綺將春豔。愁新與環曲。不言長相思。但覺意纏綿。芳詞申扣扣。新學獨拳拳。瓶卉爲生姿。銀燭亦含妍。惺惺芳歲盛。婉婉媚華年。華年自堪惜。感此愁如織。方思愜舊遊。之子忽良覲。誰知遽離別。星駕不遑息。豈怨歡未終。卻悔逢今日。偶作呈外子。



臨池追夕涼。披香夢清越。澄懷積幽愫。坐惜非芳歇。荷風變秋裳。蘭淚啼煙葉。  
不作悲秋人。天游長自悅。全身默待時。勿用潛龍德。潛龍以不見成德管甯所以箴邠原也危行言孫其幾庶乎雷雨終奮飛。匡時建長策。

秋蘭篇

秋蕖媚夕池。秋蘭蔭石井。灑灑淩波姿。裊裊沈湘影。芳葩泣溽露。紫莖迎素霜。相將紉作佩。長襲芙蓉裳。

西齋坐雨同外子

開軒坐清曠。蕭條風雨遲。林靄羃佳氣。嘉樹澹華姿。養知寓無竟。懸解良所師。暗泉鳴幽草。夕波揚寒池。庭廣景逾寂。秋晚期勿遺。東山儻偕隱。抱甕甯敢辭。

塘上行

塘水不可測。千尺涵縹碧。塘上菖蒲花。九節無人摘。翩翩雙鴛鳥。弄姿映明燿。



何處沐芳人。往來時有迹。

露坐同外子

鳴絃對爐薰。白露零玉軫。夕飈散晚榮。香滿花間井。裊裊襟上涼。乍驚明蟾影。蕭散帝網中。疲疲亦徐整。外化心不勞。琴醞良佳境。

喜君至至

舊交愜良覲。頓展平生眉。玄談悟龔俗。濁醪命清卮。自推同類愛。空有大同期。感彼松柏香。不爲寒暑移。

題鍾貞女詩

清湘萬古含愁綠。淑姬鍾秀溫如玉。幾曾寶鏡舞青鸞。偏聽哀絃訴黃鵠。黃鵠哀鳴是女貞。早知風義慕陶嬰。醴泉源遠分靈液。本來家世重簪纓。簪纓繼世誇漣水。祖父忠良能濟美。劉家姊妹嬌茗華。三妹清才通妙理。窈窕清才最擅



場。玉台吟罷坐薰香。珊瑚鎮日依書案。翡翠終朝伴筆床。筆床纖手簪花格。進  
士何妨稱不櫛。隨宦暫離南浦雲。放船同載西湖月。西湖月白照蓮花。不向蘇  
隄門鈿車。自古中郎誇有女。幾時徐淑配秦嘉。秦嘉少日多才辨。繫定紅絲佳  
氣展。羸女能爲引鳳聲。李郎不愧乘龍選。乘龍妙選結朱陳。一棹歸來幾度春。  
最好蘭閨遲豔福。先開梅嶺是良辰。良辰百兩盈閭巷。露華初濯天桃種。金屋  
正欣不日成。玉棺豈料從天降。天降凶災可奈何。悲風颯颯捲銀河。那堪靈鵲  
成孤鳥。便把衰麻換綺羅。綺羅拋卻鈿釵折。已自灰心先截髮。憑棺一哭當新  
婚。破鏡千秋成死別。死別新婚禮數殊。素車含淚啓青廬。自將微命從夫壻。強  
忍殘生慰舅姑。舅姑珍重相憐惜。洗手羹湯奉朝夕。此時連理許分枝。他日傳  
書看畫荻。畫荻何心更畫眉。懷清好自盡當爲。芳徽絕俗原無忝。朗節如山永  
不移。吁嗟貞志惟金斷。瑤池冰雪胸中滿。禮宗終見表門楣。燃脂紀事昭彤管。



烏夜啼

香露搖蕙枝。柔飈澹空幃。拳幃覽明月。驚覩啼鳥飛。三匝繞柯庭。母死忍來歸。啼鳥爾勿啼。我亦迷瞻依。年年盡鵲血。拊膺徒歎歎。哀哀陟屺思。莫報三春暉。

對雪

空林啞啞鳥亂飛。蘭閨一夜寒侵衣。天公玉戲達清曙。起看世界生光輝。乍堪瑞蘂開瓊樹。復訝朱欄惹飛絮。繡屏寶鴨燼無溫。碧沼銀鸞寒失素。煮茗雲鬢伴讀書。徵歌太尉卻嫌麤。幾處酒酣紅燭院。謝家吟穩菴紗幙。紗幙裊裊寒猶澀。刻成翠蠟吟偏急。錦字催題墨未勻。銅荷膩處花頻集。詞賦梁園勝事多。百年回首奈愁何。依稀鎮日傳芳讌。惆悵當時白雪歌。

碧景繡寮牡丹盛開諸姑姊妹讌集有作

盈盈鏡檻聞清哢。霽破光暖初送。楊柳飄絲媚晚晴。桐華滿徑迷么鳳。忽驚濃



冠豔羣芳。紫膩紅嬌。總向陽。洛縣從知誇錦幃。傾城端不數姚黃。玉階漫使名  
芳寂。西園永晝。開瑤席。錦字催賡白紵詞。璇閨初緩流黃織。解語初宜藹暮烟。  
含情脉脉戀瓊筵。富貴欲嬌金屋麗。風流長伴玉堂仙。玉堂金屋真殊衆。珠簾  
繡幌春痕重。不燒翠蠟照紅妝。已自天仙醒詩夢。詩夢連朝瘦碧絢。清吟婉婉  
動琳琅。花時每怯春陽老。歡讌那知春晝長。揮毫一瀉波千頃。漱澗堂東生兔  
景。醉裏朱顏花氣芬。座中釵釧纖雲靜。華星炯炯明矚清。銀蟾照影皆娉婷。舉  
觴還祝花長壽。同豔人間羅綺春。

景宮陽井雙桐歌

景陽深夜猶傳蹕。臺城一半狼煙直。瓊枝撼碎珊瑚聲。井底脂膩暮愁溼。桐英  
爲君憔悴死。俛仰含情看君入。銀牀斑駁蘚痕青。綠雲繞樹春魂迴。翩翩深苑  
妒垂楊。刷翠眠蛾弄眉色。不道秋來有衰朽。西風吹桐脆如藕。丹山十里玄鳳



翻。玉井孫枝憶主恩。

乳燕辭

融曦著處花心吐。海棠初風燕初乳。試調玉剪破新春。垂楊盡作黃金縷。

雜詩

秋涼多煩陰。林塘晚蕭瑟。西風損翠縷。繁絲正愁極。平蕪暮色起。輕寒始向壁。婉婉蓼莪悲。默默情猶澀。此心那可任。憂來日荊棘。

南窗偶書寄五姊瀉甯

節暮暑漸興。夏木紛已碧。書齋日爲暇。坐愛疎櫺闥。長條灑輕陰。細石分泉脈。天高月華小。露下星河白。之子忽我違。邁矣音塵闕。遙憐共茲夕。思與清輝發。良覲豈無期。中心自糾結。高軒儻得迴。永日晤言說。

閏端午



又過天中節。重傾壺裏春。良時逢閏午。清燕賞芳辰。畫舫爭前渡。幽蘭換舊紉。榴花紅不斷。藕節碧初勻。袋憶金魚賜。翎添翮鳳新。登臨懷楚客。覓句記同人。龍馭羲和挽。臬羹兒女陳。依然長命縷。頤養苦吟身。

越溪曲

采。思。耀。采。張。高。樓。楚。管。未。發。蠻。絲。柔。娟。娟。麗。月。水。潑。地。裊。裊。綠。波。風。送。秋。楊。柳。紛。陰。老。平。陸。蕙。草。衰。暮。歇。汀。洲。越。女。菱。舟。欲。輕。舉。菱。葉。菱。花。滿。清。泚。直。教。秀。靨。勝。東。家。未。肯。顰。眉。學。西。子。綠。鬢。垂。雲。嬾。不。梳。紅。粧。映。入。清。瑤。裏。畫。舸。相。逢。晚。更。移。胭脂。滙。勝。若。耶。溪。自。能。豔。色。傾。城。國。太。息。南。金。鑄。范。蠡。

川上

沿。洄。青。翰。舟。蕭。散。煙。波。興。攜。琴。穆。容。與。石。瀨。雜。清。聽。紅。隕。墜。楓。香。碧。合。寥。川。暝。秋。天。曠。何。許。不。聞。高。人。詠。



秋夜辭

蠟光紅炮蘭澤融。花宮晚漏催玲瓏。珠箔千絲縷篆纈。芙蓉十里圍香風。促織  
驚秋鳴絡繹。機上寒絲不盈尺。平陽歌燕賜綾袍。披香殿外月初高。



儀孝堂詩集卷一終



儀孝堂詩集卷二

衡陽張何承徽懿生

近體

別謝君玉三年懷念良苦偶讀王新城夜泊江口聞笛詩擬作寄贈

夕陽沙草綠。掩曖滿汀洲。無那聞清吹。令人起別愁。泠泠風籟急。颯颯桂旗秋。髣髴征西怨。淒清隴水頭。

碧雲江上合。畫舫月中停。翠篠聲將裂。秋魂爾獨醒。乍堪泣猿鳥。直欲感精靈。况有離居恨。頻年啼鶴鴒。

一夜淒金縷。誰家蹙翠蛾。清愁不須入。秋氣感人多。孤櫂自容與。離懷將奈何。碧空流籟滿。銀漢欲微波。

馬融工截竹。瑟瑟作龍吟。一夕烟波滿。三秋風露深。空林激流徵。水木散餘音。



自爾騷人慨。何須感客心。

春柳四首

萬樹依依拂帽斜。晚晴啼綠夕陽鴉。玉蛾老去傷螺黛。錦纜春還盼翠華。歌散猶疑後庭月。顰來休傍莫愁家。長隄日暮無人見。飛盡東風白雪花。

綺陌風光嫩麴塵。濃妝催起秀眉顰。鶯調煖日銀簧脆。燕蹴微風翠浪勻。金縷迷離樓上舞。玉關淒絕笛邊春。遊人莫漫頻攀折。認取枝頭別恨新。

酒帘青颺晚江村。棖觸紅亭漫一尊。灞岸有情還惜別。漢南何事苦銷魂。新詞樂府傳銀管。細雨烟痕夢白門。搖曳風光三月半。鞭絲樹影極春繁。

披拂長條水一隅。玉湖波靜點銀鳧。渡歸桃葉春深淺。別去楊枝夢有無。莫更秋來金萬縷。祇今烟鎖翠千株。何人聽唱陽關曲。對爾依依展畫圖。

擬許丁卯秋日赴闕題潼關驛樓



四望極蒼茫。登臨傍晚涼。山連秦地闊。城壓大河長。秋色催蘆白。霜痕醉樹黃。帝京看咫尺。猶夢水雲鄉。

擬王摩詰終南別業

別業占空谷。西風生早涼。故人同獻傲。半畝樂耕桑。古徑雲仍鎖。秋深雁亦忙。東籬思靖節。新菊悉清香。

擬王摩詰山居秋暝

山雨過柴門。泉聲石徑喧。松高孤鶴返。楓老暮鴉翻。斜日燒空谷。秋光淡晚邨。携尊歸緩緩。無語對黃昏。

擬王摩詰過香積寺

十里晚烟濛。鐘聲幽壑中。曇雲開竹院。樵徑度松風。嵐氣熏衣碧。斜陽挂樹紅。欲投人處宿。踏葉過橋東。



擬溫飛卿送人東遊

故人江上別。揮手各驚心。颿挂江天暮。風高塞雁橫。猿聲牽客恨。秋色淡離情。何日重携手。敲詩對晚晴。

擬溫飛卿早秋山居

萬壑收殘暑。斜陽挂古松。遠聞鐘隱隱。時聽水淙淙。早雁飛前渚。閒雲度遠峯。籬邊新種菊。霜下豔應濃。

擬孟山人歲暮歸終南山

幸有敝廬在。飄然名利空。朔風號老樹。寒月挂孤桐。泉石情無限。菘鱸興不窮。梅香時入夢。高臥勝隆中。

擬孟山人宿桐廬江寄廣陵舊遊

泊棹滄江晚。桐廬動旅情。十年猿鶴侶。一夜浪濤聲。風雨愁羈客。鶯花憶舊盟。



廣陵回首望。恍慨歎勞生。

擬趙承祐越中寺居

一角春城晚。青青漾柳旗。夕陽禪磬寂。古寺足音稀。暮色亂林景。疏煙淡蓼磯。六朝金粉豔。輸與佛忘機。

擬孟山人臨洞庭上張丞相

勝景洞庭秋。風煙望裏收。乾坤隨浪轉。日月湧江流。雲斂君山淨。波搖夢澤浮。茫茫思利涉。倘是濟川舟。

擬孟山人早寒有懷

瘦盡青山影。秋江生早寒。雁從南國度。家隔嶽雲端。有客孤颿遠。懷人酒盞寬。遂初何日賦。歸思問天難。

擬杜子美春日懷李白



醜頓曾來夢。艱危況遠行。東風牽客恨。春樹觸離情。瀟灑絕塵俗。疏狂无死生。  
老吟才不展。多難涕縱橫。

禰衡墓

漢陽城外暮雲橫。鸚鵡洲前春浪生。自古奇才甘死賊。江聲休作不平鳴。

護花

數枝濃豔趁春栽。善護名花亦愛才。吩咐鼯鼯多設網。休教蠶蝶過牆來。

詠懷古蹟

八首錄五

一舸

脩然蘭楫五湖行。兩國存亡掌上輕。誰應報恩誰應怨。若論功罪未分明。

虞兮

烏渡蒼黃霸氣收。虞兮節義自千秋。龍門本紀分明在。莫笑君王是沐猴。



出塞

大漠風沙塞馬嘶。琵琶胡語韻清淒。麒麟閣裏和戎策。還倩毛公染翰題。

當壚

秋月春風無限愁。當壚寒典鷓鴣裘。茂陵琴操渾閒甚。惹得塵心到白頭。

墜樓

燕子樓中尙惜軀。波瀾自問妾心無。原來一樣輕生法。羞作人閒莽大夫。

夏日山居

僻徑人蹤少。湘簾捲落暉。松風清掃榻。槐影碧侵幃。山晚蟬聲急。齋幽暑氣微。南窗事高隱。笑我未全非。

和仲兄初夏新晴詩

雲斂楚天碧。曉晴剛夏初。槐陰三徑雨。花影半牀書。煙歇茶爐冷。心清夜夢疏。



吾廬吾亦愛。長共白雲居。

定王臺

雲氣陰森接翠微。當時遺址瞰崔巍。臺荒紅慳春塵滿。靈往碧紛神雨飛。坏土千年經小劫。名王一代想遺徽。遠來弔古傷心客。應有山河淚滿衣。

百花生日

謝家詩夢映池塘。初日簾櫳燕子颺。白社風流逢勝節。清詞新豔趁年芳。春搖綠鬢尊前酒。人凭紅闌雨後涼。我欲高吟濡彩筆。繡幡題句壽花王。

君玉信宿舍間並携詩卷見示

之子一朝覲。故人三載思。別來頻有夢。相見豈無詩。夜話移銀燭。清唵步綠墀。但愁歡易盡。詎忍贈將離。

誦君山水句。宛對輞川圖。絕羨仙居好。自應人境無。桐華看早實。鳳子已能呼。



佩卿聲清神秀  
後夜尋離夢。長沙片月孤。

○見燕

翠幕紅襟燕。乘春更早來。舊棲金屋近。倦睎玉堂開。脆語含花細。輕身學剪纒。泥香玳梁落。秋至又當回。

○三閭大夫祠

連天芳草綠蒙茸。哀郢當年怨恨重。不分鳩媒偏妬好。可憐魚腹獨能容。靈旗  
髣髴飄神雨。碧瓦參差對遠峯。惆悵祠前舊明月。秋江搖落照芙蓉。

○秋雲

澹澹秋河畔。雲羅照眼明。無風出塞早。映月傍宵生。乍可破空碧。誰言滓太清。  
從龍應到海。萬里好縱橫。

○秋月



蟾月秋逾潔。清光濯露鮮。乍堪弓並曲。旋見扇俱圓。萬象涵金鏡。千巖澹翠煙。更須三五夜。相看倍嬋娟。

○ 秋山

日落寒山碧。煙光縹緲浮。丹巖宜返照。翠脊露清秋。人度深潭影。猿鳴落木幽。憑誰五兩屐。到處憶遨遊。

○ 秋水

泠泠望江水。日日弄潺湲。翠蓄寒潭淨。紅飄落葉殷。影涵天一色。涼瀉月千灣。指點秋光裏。銀鷺爾自閒。

恭送母大人回湘鄉

自嘆門閭久式微。乍親慈範意依依。羹湯方幸廚初入。几杖何堪棹又歸。湘水迷離遮遠望。寸心迢遞祝春暉。料應母壽如山壽。長共仙郎舞綵衣。



送康太夫人歸

捧杖初紆十日情。挂帆偏又趁冬晴。深慙燕寢承歡拙。忽覺華堂別思生。壽母祇緣心豈弟。郎君聞已氣崢嶸。瓣香遙祝風姨順。好送慈雲自在行。

贈別小姑靜宜

之子故英秀。飄然見性情。幾時重把臂。一覲若平生。芍藥惜將別。蘋蘩期令名。何須茜窗裏。婉婉動離聲。

送仲純外弟奉母還里

玉樹英姿稱衣紉。羨君歸去侍庭幃。碧紗步幃依然在。對客何緣一解圍。

武侯

巾扇飄然指六軍。木牛流馬亦奇勛。先生出處關炎漢。天下英雄有使君。三顧高情酬兩表。千秋大業限三分。秋風秋雨荒祠暮。松柏蕭蕭鬢嶺聞。



夏曉

牙籤微動曉風酣。簾外紅蓮露半含。萬物靜觀生意滿。小窗閒坐讀周南。

月夜偕五姊

花影橫斜轉玉階。三千劫裏寄形骸。閒拈險韻敲奇句。爭睹新添翡翠釵。

外子省親湘東賦此誌別

絲柳初堪折。東風蚤自妍。乍離淒綠鬢。行賞惜芳年。碧漢清愁永。銀蟾古怨娟。妾心如滿月。千里向君圓。

感懷再呈外子

賈生思獻策。王粲及春遊。國步艱難日。人才喜起秋。徙戎輸蚤計。戡亂乏良謀。自古嚴夷夏。空懷漆室憂。

煙雨樓長在行吟。此再經。餘杭春被酒。樵李樂趨庭。海國懸孤憤。豪情隘四溟。



由來期樹立一爲拂青萍。

寄懷家兄

湘濱芳草色。澹澹怨如煙。春水蘭橈遠。新詞杜若妍。艱辛同蚤歲。問學愧平權。慘綠何人識。黃裳正少年。

寄懷碩仙兄嫂

美人在何處。渺渺望西方。別意將紅豆。愁心極綠楊。空聞青鳥語。不見錦鴛鴦。香夢何時逗。亭亭怨碧湘。

憶玉池蓮花寄懷靜宜小姑

明流玉池靜。菡萏想芬芳。香豔將人遠。蓮絲惹憾長。相思空復爾。欲渡悵無梁。他夜繁煙雨。娟娟夢靚粧。

晚眺憶遠



無邊春色亂清愁。更見垂楊踈地柔。休向高樓顰翠黛。輕離端不爲封侯。  
遠帆遙憶翦江輕。新漲桃花逐曉晴。何處青山解迎送。清尊畫舫聽啼鶯。

嫁杏

春光初旖旎。杏嫁趁年芳。天上憐仙種。人間重靚妝。賞宜燃綠桂。折更惜繁香。  
他日紅綾餅。同君豔玉堂。

春晝吟

焚香坐岑寂。一院靜悒悒。晴日紅輪淺。春流碧玉深。風光自流麗。花鳥欲清陰。  
物競爭存際。陶然幽素心。

落葉

早涼生木末。衆綠颯難留。麗夕兼霞影。和烟惹別愁。寥天初過雁。霽月獨憑樓。  
淒動騷人意。拚將一色秋。



午日漫興

浴蘭風自麗。裊裊襲高梧。軒敞宜清讌。卮香泛綠蒲。絲絲長命縷。赤薤辟兵符。佳節那能遣。高吟弔左徒。

柳

裊裊已難任。相思爾復深。阿誰憐翠黛。空自縷黃金。綠亂風中絮。紅圓鏡裏心。玉驄消息遠。春去更駸駸。

七夕

華星初粲爛。窈窕及茲辰。莫怨秋難夕。甯教豔作春。留連鴛杼歇。婉孌玉鉤新。此恨人誰識。針樓意獨親。

喜得君玉書

瓊樓迢遞憶仙居。舊雨城南雁影疏。久別幾勞清夜夢。八年一得故人書。紅箋



啓處香先發。紫篆函來錦不如。莫漫臨江望蘭楫。碧湘清淺隔芙蓉。

書答伯子札後

紅樓深倚綠楊斜。眺遠翻憐客憶家。欲問故園春幾許。綺窗開徧玉梅花。

送璞兄之官蜀中

自昔蒼生望謝安。清時作宰共傳歡。滿帆霽色來瀛海。三徑清風憶講壇。名士爲官信瀟洒。阿兄持法總平寬。興邦第一開民智。莫漫頻歌蜀道難。

銀毫判牒動如神。學道相期漢吏循。玉壘風雲歸筆底。錦江春色屬才人。碧鷄懷古詩成帙。白帝尋秋雨墊巾。花落訟庭新政簡。大書雷字莫嫌頻。

中秋無月寄外子武昌

三五意盈盈。偏遲兔影生。團圓孤令節。婉晚逼秋情。玉宇笙歌寂。瑤階風露清。頻年離別感。拚作此宵醒。



○十七夜月再寄外子  
兩地憐佳節。雙情限洞庭。詩成秋共豔。蟾晚影逾娉。仙意芬丹桂。生香泛綠醞。清輝應共賞。芳思惜惺惺。

○寄君玉

澤蘅萋已綠。采采近昏黃。未覺花盈掬。微聞衣帶香。離堂淒白露。秋館欲繁霜。只爲徽音闋。清寥滯一方。  
涼雨桂枝折。新秋河漢高。相知數傷別。感歎欲成勞。玉腕酥香酪。金壘潑翠濤。行將判此醉。因夢聽仙璫。

○聞琵琶

挑抹銀絃寫均清。千秋胡語未分明。漢家留得青青冢。何事餘音總不平。

寄榴笙姊



露井寒梧葉乍摧。酬人立遍玉階苔。十年風雨連吟榻。百里音書憶大雷。好句難從離後得。當歸曾向夢中裁。敲門誤認鈿車急。幾度驚呼阿姊來。

倣大樗堂體詠雪

衝凍梅花沁骨香。漫天飛絮逐風狂。寒侵東郭青絲履。豔奪盧家白玉堂。萬頃滄浪全浩渺。大千世界亦清涼。定知驢背疏狂客。被酒臨邛賦鷓鴣。

和家兄送人從軍

破浪看乘宗慤風。也應許國此心同。從知馬上橫戈客。不數燕然勒石功。虎氣宵騰秋水白。蜺旌春繞將星紅。他年直斬樓蘭返。纔識書生膽略雄。

與家兄及君玉聯句

菡萏澹清秋。懿生 亭亭漾碧流。君玉 餘香滿羅袂。璞元 素影泛銀鷗。懿生 風靜

蟬吟歇。君玉 樓高鳳吹收。君玉 善弄 芳時饒勝會。懿生 佳句與同酬。君玉



涼思滿高閣。璞元午香生畫簾。懿生澹懷澄五柳。君玉宮體豔三縑。璞元墨漬

琉璃匣。懿生雲開翡翠匳。君玉幽齋絕行跡。璞元壺漏冷金蟾。懿生

客燕辭巢急。璞元烏衣入夢遲。懿生山寒秋水碧。君玉館靜蘚痕滋。璞元翠帟

圍香坐。懿生紅鱗暖薄池。璞元晚霞應更好。君玉相約共題詩。懿生

贈答懿親姊妹之作

起撥殘薰淪茗泉。無端離夢攪春眠。綠雲曉院梧桐雨。紅雪疏攏芍藥煙。被疾  
喜逢修禊日。懷人愁入養花天。故山且住爲佳耳。一夜深林咽杜鵑。

不分人間小謫仙。林間風雅孟光賢。洪篇瑞奪天孫錦。素質清分玉井蓮。鳳紙  
烏絲朝寫韻。蘭缸翠幌夜攤箋。吟壇漫問誰牛耳。髣髴輸君十載前。

好句鏗金字欲僊。也應幾度聳吟肩。情傳鴻雁雲中信。豔奪鴛鴦湖上蓮。博士  
徽音歸翠袖。相如才藻品紅牋。從今焚卻君苗筆。愧向香閨共競先。



旖旎晴霞燦碧城。冰甌新滌采毫清。牙籤歷亂飄細帙。瓊閣迢遙近玉京。妙格  
翩翻翔舞鶴。新詞幽豔囀春鶯。登臨漫賦三秋感。雲葉遙牽兩地情。  
料峭霜風湘水寒。桂樓西北凭闌干。玉璫瓊札兼旬斷。黃絹青緗倒薤看。斜日  
江頭鷗夢遠。晴沙灘上雁行單。幾人記取林泉樂。十載情輸菽水歡。  
瓊筩吹斷賣餠聲。三月鶯花憶友生。玉版摹臨春欲晚。銀觴祓禊雨初晴。詩書  
不分能成僻。香茗伊誰獨有名。曰莫寥天雲自合。默含離思向芳城。  
輕縷柔絲踈地長。靜看垂柳憶容光。雨滋薜荔緣牆綠。風約酴醾入夢香。有限  
詩情慚問訊。無多骨肉感他鄉。江堤春色濃如許。不爲愁人減別腸。  
盼斷紅樓十二層。也應和藥露初承。晚風簾箔鈎銀蒜。曉月妝臺映玉菱。掠鬢  
舊簪含綬鳳。熏香新換散花綾。經宵射覆春燈影。半盞芳醪醉不勝。

和家兄檢家惠生遺詩之作



無兒寧有望。不第更無論。遺藁搜空橐。諸生散寢門。已悽齊下士。猶共楚招魂。風義何人解。飄零片羽存。

席上作

秋色老長沙。重逢萼綠華。仙羹膾玉帶。香粒煖胡麻。石壁塗丹篆。瓊樓燦碧霞。殷勤主人意。爲我寫宮紗。

夜坐偶作

卍字文窗綠。全咳敗葉紅。燭搖珠錯落。簾戛玉玲瓏。露鶴醒涼月。霜鐘落晚風。深宵將此景。寫韻入焦桐。

聞笛

晚烟涼意透蟬紗。遙憶臨風綠鬢斜。細雨江城春已盡。不愁吹落到梅花。

深宵



深宵覓句倚檀欒。蟬翼紗明。兔魄寒澹。有清香花影。寂不勝涼意。溼冰紈。

得君玉書因寄

銀鈎纖格浣花箋。詠絮才人。珠玉篇紅杏。新詞春漫興。白鸚慧業靜參禪。君應風雅多新調。我豈詩情勝去年。後會迢遙更何日。碧紗蟾影幾回圓。

五姊歸省瀉甯將有數月之別作詩紀行

十年歸省數月別。已不勝情離思生。四壁斜風垂蠟淚。一簾疏雨助愁聲。盡鋤芍藥無多語。共道蘋蘩有令名。舊學商量知不負。二南遺均聽重賡。

西堂

小雨潤芳泥。深堂翠幙低。香生紅芍藥。涼到碧玻璃。風暖輕鶯羽。煙微篆麝臍。玉梅何處遂。吹落石闌西。

暮春聞鶯



啼遍楊枝睨睨新。夕陽間煞倚樓人。不須只向東風訴。憶否今春是舊春。

題畫冊

遙峯翠黛染雙蛾。鵠鼎濃薰透綺羅。午繡停鍼長晝倦。玉櫛紅粟戲鸚歌。

中秋是夕無月

刻燭篇成墨未乾。翠簾斜挂紫檀爍。遙天盼斷常娥影。玉宇瓊樓澈夜寒。

和家兄題徐蕩舟先生小照

華髮光巾縮玉簪。散仙蹤跡寄煙岑。平夷策上驚樞密。落第詩成豔士林。秋雨

浣花三太息。春風黃鶴一沈吟。人間名利消除盡。璧月冰壺證此心。

和家兄送人從軍詩

壯士揮戈奮鷲翰。春效盤馬競登壇。紅城笳隱雞籠遠。碧海潮生鹿耳寒。一箭  
信能威絕徼。幾人和議便高官。施侯勳閔猶旌鉞。三百年來孰二難。



儀孝堂偶書

玉尺冰壺壓案新。映階芳草碧鋪茵。烏絲午寫蘭亭帖。鳳紙輕摹洛浦神。心靜不嫌詩思淡。身閒好與道書親。焚香淪茗消長日。爲有流鶯恰比鄰。

擬義山體

東風未解鬢。花鳥嚮清晨。燕語那能妒。鶯啼祇是春。彩幡嬌麗日。寶馬逐香塵。三月曲江曲。遙聞賦麗人。

久不得君玉書

聞道僊居隔院深。經年不得數招尋。椒蘭煖霧棲銀練。桃李清陰在玉琴。燕子來時蹤草草。魚兒去後信沈沈。遙應睡起春痕重。立向東風花滿襟。

讀書

才蹇真成歎。纔能讀兩京。稍知燔古業。便下有帷情。密樹鶯簧滑。高枝蝶粉晴。



陶陶兼洩洩。芳意滿雕甍。

晚成

書聲初歇曲臺端。鳳吹淒清傍晚寒。芳草淥波春近遠。暖風黃鳥語闌珊。明明星露初懸景。寂寂鶯花正倚闌。好景莫教頻放過。然膏還覓舊編看。

呈家兄

誰知滄海橫去流非。獨有憂天大布衣。不信文章憎福命。待看道路擁旌旂。銀尊對酒雙歌激。玉麈談兵一笑揮。秋後著書盈幾寸。食貧猶采北山薇。

至日

寒星欲嚮晨。忽覺歲華新。節應黃鍾律。絲添繡閣春。梅香初破凍。月影若爲鄰。渺渺澄潭水。微風縞碧鱗。

庭梅雪中盛開



寒香熏鶴夢。疏影澹詩魂。棖觸羅浮月。依稀認舊痕。

除夕雜詩

祭詩

嬾下金人拜。風流仿閩仙。愧無狂佛句。空送鼠兒年。清供芬丹荔。吟魂夢碧蓮。精神空復補。明日又題箋。

賣癡

庶子詩才麗。長康畫理多。從來壽者相。不信佛家魔。齊俗空嗟爾。吳兒竟恨何。智囊綠智誤。猶唱懊儂歌。

醉司命

世人皆媚竈。而我亦王孫。况復逢佳節。寧能吝酒樽。神傳黃帝古。祀比碧雞尊。不識誰沈醉。扶桑已曉暎。



藏鈞

鈞待君王得。風神便自奇。間披荆楚記。猶惜趙昭儀。妙手空能悟。靈心獲豈遲。  
東方同射未。髣髴樂清時。

古意

席上春初歇。城西樂未央。雕梁明玳瑁。錦幌擘鴛鴦。酒暈臙脂透。風薰豆蔻香。  
笙歌雙槳去。搖入莫愁鄉。

九月三日長姪宇平生誌喜步兄韻

懸弧欣值菊黃時。英物聲從此日知。定擬聰明如乃父。代傳清白有佳兒。掌珠  
珍重心應愜。頭角崢嶸性更慈。繞膝今看添樂事。弄孫休說五旬遲。

紀夢

裙褶綠迷蝴蝶影。衣香濃染鴝鷓斑。蓬萊宮杏華清冷。不敢題詩詠玉環。



熾歌靈步倚春宵。洛浦神人鬪細腰。柳是畫眉凝翠黛。杏如曼鬢暈朱潮。

○ 讀榴笙姊妙香室集梁哲生小影題詞追作

白晝何人跨青鶴。蕭然經劍逃儒巾。俗兒意外產仙佛。此子胸中無漢秦。一念貪嗔卽滄海。幾時遊戲來紅塵。浮雲富貴等間劫。玉座曇花應笑人。

○ 題繹雅堂詩集

玉尺瑯環寫韻奇。青緇黃絹界烏絲。瓊窗賦就櫻桃暖。翠筦吟成柳絮知。三月

鶯花開綺思。一匳秋水想丰姿。詩集中對鏡極佳楚湘自是騷人國。蘭芷芬芳盡入詩。

○ 詠古二首

西望阿環鶴駕來。碧桃曾見幾枝開。甘泉月落金莖曉。青雀風高玉輦迴。漫道求僊聞秘訣。可知回首卽蓬萊。聖朝龍骨誰堪換。千載昆明冷劫灰。

簫管聲譁擁畫輪。石城煙暝鳳池春。熾歌入座瓊枝豔。璧月當筵舞袂新。不分



才人偏解賦。可憐天子自蒙塵。江東王氣銷磨盡。江孔何方更狎賓。

感事

無端蜚語漫相侵。星隕銀臺思不禁。謁者功名真磊落。營平方略早深沈。金刀數聽增泉府。玉鬯應先動帝心。儻使征西還有賦。莫裁哀竹作龍吟。

五姊歸省舅疾

曙色漸侵晨。依依逐道塵。命艱千險歷。啼極百愁新。昔日芝蘭子。頻年離別人。疎條不勝折。莫向綠楊津。

仿紅鶴山莊女郎詞爲晚慧作

垂髻翩翩工屬對。亦能翠刻與紅裁。可憐漱玉曾何補。惹得人間道豔才。玉箱日日隨阿母。嬾畫雙蛾鬪額黃。十歲女郎好明嫿。獨居簾閣疊縹緗。鬪草偏逢嬖弟閒。紅衫重暖鷓鴣斑。猶餘一種嬌癡態。輸卻櫻桃怒小鬢。



。茂陵同外子作

英雄亦有輪臺悔。學道曾無不死方。御宿遠望靈縹渺。神仙終古事微茫。空聞  
寶馬歸天廡。愁見銅人出建章。獨憶春來茱陵畔。蘅蕪長得夢中香。

。塞上詞

獵火望祁連。千碣北斗懸。胡兒屢窺塞。漢將自臨邊。白雪黃龍戍。青年寶劍篇。  
哥舒何上略。一爲斷狼煙。

。山中晚春

蕭條涼雨歇。遠見夕陰暉。野鴨窺池淥。春鶯轉翠微。香深晚花靜。草長行人稀。  
應有少微隱。臨風懷采薇。

晚春見院中薔薇

薔薇紅自好。日夕傍闌陰。翠幄涼初捲。綠墀春又深。繁風爲護豔。重露若難任。



劇賞嬋娟態。攀條思不禁。

秋墀見菊

浙瀝金商動。寒林散晚香。經時霜始白。應節菊全黃。暮色遲花塢。秋陰生草堂。茲來蘊衆卉。羨爾獨能芳。

答君玉寄懷之作

詩情畫意兩清華。逸興偏饒小謝家。半帙雲山僊均冷。一篇秋水墨痕斜。擘牋香染夫容粉。鬥草閒拈豆蔻花。應是晚晴新雨後。夕陽紅暈碧窗紗。

金鈎風靜壓簾輕。遙憶瓊軒邃均清。絳雪才高詩博士。綠紗禮重女門生。

君玉寄家

兄詩有問字寧虛十載心之句

葡萄錦褥圍棋坐。芍藥新篇刻燭成。物我平權應記取。不甘庸

碌不邀名。

贈曾碗如



詩界別開爭自主。早年才調壓鹵洽。焚椒繡佛香成海。研露臨書花滿櫺。名錫  
滋蘭騷摘豔。派分容桂地鍾靈。料應他日聯吟社。古學真詮有六經。

晚眺

雲淨碧天闊。湘簾捲玉鈎。山隨颿影活。江帶夕陽流。不盡滄桑感。無邊蘆荻秋。  
未堪卑溼地。堪杵急寒愁。

初見梅喜而有作

鬲斷紅塵影。梅花境絕幽。橫窗自清淺。覓句好勾留。老鶴得仙趣。遠香生酒甌。  
曉來無際白。大雪壓寒流。

古意和外子

寇盜尙橫行。單于未解兵。壯心中夜起。無處請長纓。

與五姊談開元遺事



百尺臺前事可哀。淋鈴一曲兩心摧。那能瑤島求仙去。空望香魂入夢來。太液池荒縈碧草。長生殿冷長蒼苔。早知勤政清宮闈。未必郎當哭馬嵬。

聞警和外子

欲掃夷氛事弭兵。何時據亂易昇平。狼煙千里連秋月。戍鼓三更咽古城。五虎口中終負約。七鯤身外復要盟。挑燈再展陰符讀。將相誰堪繼賈生。

簡君玉

壓綫曾停幾度鍼。裁詩耐得薄寒侵。畫闌靜畫翻紅藥。繡閣風薰暖鬱金。簾裏紫腔涼月浸。花閒綠綺晚香深。君玉善崑曲近復學琴華嚴法界真如在。八部天龍證此心。

君玉以讀紅樓夢葬花詞有感二絕見寄卽和

一曲新詞未忍聽。幾時塵夢絳珠醒。百年甘露千年憾。化作仙人淚雨零。



悄餞殘春奠玉觥。怡紅庭院雨初晴。落花自是無情物。何事淒涼爲不平。

○ 月夜書懷和外子

繡幔宵涼捲月華。諸天聞樂靜無譁。樓前鳩鵲拋絨綫。簾內臙脂奪茜紗。落紙文章蘇蕙錦。鬲牆歌管莫愁家。億千師子維摩室。願與逍遙服紫霞。

春日雜詠

燕燕語雕梁。春閉簾櫳。緊澹澹聞花香。微吟在碧影。

和風煽春芳。葳蕤以葱蒨。柳眼一痕青。黃鸝百聲轉。

皎皎映朱霞。滿日花光絢。碧幔籠幽香。春人唾絨倦。

蟬翼紗紗紋。晚晴涼綠生。輭紅飛不到。長對玉壺清。

○ 浣花後七日

黃梅爛孰燕巢梁。五濁塵消罷晚妝。紅綺窗深閒繡佛。紫金爐煖靜焚香。玉欄



繞榻酣清夢。絲柳多情媚夕陽。獨悟天人還獨立。寸心明鏡共靈光。

雙蕙寮感懷

芳塵凝榭恨徒然。窈窕文窗碧更鮮。惆悵聯吟人不見。滿空飛絮怨如煙。

夜坐同外子

三界惟心造未央。共開龍腦靜添香。玉梨微月消塵障。冰簟清風夢大康。莫漫清談雄白馬。相期浩劫救紅羊。中年哀樂渾閒事。匡濟艱難願待償。

送春日

春事忽云暮。綠槐陰漸清。芳菲自當歇。鶻鳩爾何情。脉脉鶯聲老。翩翩燕羽成。殘英渾惜別。飛去落雕甍。

檢淑雲嫂氏雙蕙齋遺詩

正擬金丹覓上池。紅冰無那損春姿。經年苦雨迷芳塚。午夜靈風肅總帷。玉軸



披吟停繡後。銀燈辛苦共聯詩。殘篇抱得終遺恨。灑涕還應一卷詩。

○ 出塞

秋風鳴勁弦。上將獵祁連。黃沙臨瀚海。紅旆動長川。飛狐延漢月。鐵騎損胡天。定有城南怨。清宵角裏傳。

○ 凱歌

榆柳蕭蕭大漠寒。金貂飛尉舊登壇。寶刀染得單于血。鼓吹天兵下賀蘭。

○ 戰城南

上將連營出。材官負弩迎。雲陰明玉劍。風色捲飛旌。嫖姚初上陣。單于已棄纓。妖氛昨夜殪。追虜抵龍城。

○ 擣衣曲

夜夜夢刀環。年年擣淚斑。不隨砧上月。照見玉門關。



題馬貞女所徵詩

故鄉迢遞望承涯。憶爾寒松冰雪姿。施到紅心秋未死。蘖雖黃口苦誰知名輝。  
丹詔旌貞日。血濺麻衣渴葬時。欲向璇閨式芳烈。清懷臺畔不勝悲。

醒後聞子規

夢入蓉城恨易驚。誰言烏戀暫忘情。子規一夜啼紅血。腸斷經春是此聲。

元夜得五姊書

春蠟吐光紅。開封別感叢。霜姿憐瘦鶴。泥爪盼飛鴻。折柳天涯憾。傳甘湘上風。  
青冥天畔月。空是與君同。

書答五姊札後

伊人渺不見。惆悵獨凭臨。秋色沈紅樹。涼煙暗碧岑。燈花緘玉札。雲葉拂瓊音。  
無限臨風感。離懷入夜深。



晚晴

木落驚秋盡。宜人暮霽時。煙光涵大野。樓影倒清池。斷雁北風峭。晚鴉斜照遲。縱觀天地窄。無礙自尋詩。

秋夜

歷歷星光靜。曲池朱闌翠。帶澹生姿。一鑑寶篆消清夢。半帙殘芸讀古碑。蠟炬燒餘金粟冷。露芽新鬢碧香滋。江邊幾度砧聲急。秋夜泠泠欲曙遲。

春雨懷榴笙姊

春雨鵲原暮。愁人悵別頻。嫩涼孤碧夢。花氣送清晨。寂寂唵懷永。殷殷女學新。

擬集贊設女學堂於長沙憑軒數芳序。暗過海棠辰。

懿斐書齋偶成

牙滑縹緗玳瑁裝。綠槐長夏木蘭堂。評書細墨研朝露。展畫晴紗映夕陽。暖霧



淡橫雲母暗吟脾涼沁雪芽香微風水閣游絲裊靜看文鴛浴藕塘

寄懷榴笙姊

惆悵花前漫一尊東風綠底最銷魂碧幙選纏春無影絳蠟裁書淚有痕不分  
差池鴻雁侶祇今棖觸鵲鴿原細推物理知天擇請看丹香桂子繁

步虛詞

玉女乍闌橈游戲下橈冥羽節凌虛降仙謠踏臂聽迴襦飄素雪垂佩摘華星  
被酒蔡經宅賡歌漢武庭紫泥封寶籙丹篆遺金經借問雲中犬何年亦解形  
雙成會七真縹紗引鸞笙玄妙留金簡空香曳采旌間來紫虛府更憩碧霞城  
火鍊三珠樹風騰百寶纓踏謠黃竹暮八駿日相迎

十三夜望月

簾捲蝦須夜色涼梅花猶帶鬪年香玉階怪道苔痕滑斜月一輪天欲霜



塞上曲

獵火通宵燭鳳游。防秋兵馬未曾休。長懸一片胡天月。照盡千年漢騎愁。

有感和外子

鐵血乾坤責匪躬。一生高志託康同。屏居閩海思虞寄。徧訪名山笑謝公。豈謂  
分瓜成割據。空聞種菜老英雄。補天心事擎天手。欲挾飛龍問碧穹。

志學老人以七絕十二章索和即步原韵時客都中十二章錄三

都門柳色送菲芳。笑我頻年作客忙。予來都三次皆以冬發春歸一片鄉心託南雁。春申江

畔與衡陽。時老人客衡陽眷僑居滬濱

萬家樓閣暮春雲。金碧宮牆映夕曛。方慶承平好風景。外交爭奈又披紛。時日本要

求條約甚苛

道腴心廣意如何。更憇唵懷老不磨。竹杖青鞋行樂地。碧紗籠處得詩多。老人樂



山水所經  
必有題詠

丁巳春默兒探梅鄧尉得詩甚多歸以示余爰和二絕

獨立落茫一愴神。和羹妙手屬何人。入山十里香如海。輸與孤芳自作春。  
冷豔奇芬次第尋。幾人驢背費沈吟。臨風索笑渾閒事。別有春迴天地心。




101300124

帝。體。存。存。不。能。移。幾。人。願。背。雙。背。對。仙。瀛。風。索。笑。恥。問。事。眼。背。春。風。天。地。心。  
國。立。茲。當。一。對。軒。味。變。效。年。願。同。人。入。山。十。里。香。暖。將。歸。與。萬。民。自。非。春。  
丁。巳。春。錄。兒。時。辦。渡。楫。楫。補。甚。冬。溫。以。示。余。笑。麻。二。錄。

儀孝堂詩集卷二終

中華民國拾玖年 玖月拾肆日 購買







國家圖書館



002436825